

欽定剿平粵匪方略

欽定勦平粵匪方略卷十六 壬子年

八月初一日 己卯 徐廣縉奏言七月十一日奉到

諭旨飭令提督向榮接印任事十二日該提 臣函稱已

准撫 臣 勞崇光恭錄

諭旨知照惟因病難速痊求 臣代爲奏請開缺等情接
閱之下殊深駭異查向榮屢經棄瑕錄用

高天厚地捐糜難酬乃六月二十七日先已接印任事

集之真目之四卷十二
一
七月初六日奉到

上諭之後竟敢藉詞病難速痊求爲奏請開缺實屬喪
心昧良現當楚粵兩省防勦喫緊之時儻武員
相率效尤何以挽將士驕蹇之頽風而宏

國家駕馭之遠略相應請

旨將廣西提督向榮革職發往新疆充當苦差以爲藉
病規避者戒奏入

上命軍機大臣傳諭徐廣縉曰前因湖南賊匪連陷數城賽尙阿統領大軍日久無功諭令徐廣縉帶兵馳往祇領欽差大臣關防軍營及地方文武統歸節制該大臣接奉前旨著卽帶兵馳赴衡州相機籌畫調度勿令賊匪下窺衡湘致難措手總兵福興本日已補授廣西提督如須帶往湖南差遣其提督印務卽行派員署理湖南永州鎮總兵孫應照是否得力並

著隨時察看據實具奏如不勝任卽派員署理毋令貽誤

上諭內閣曰朕因向榮久歷戎行才尙可用於道光三十年八月特旨調任廣西該提督到任以來偶有戰功無不立加優敘其官村古東兩次戰敗輒卽稱病遷延久曠職守朕以忠厚待人不爲逆億僅予薄懲旋卽復任提督賞還花翎並念其保守省城勞績開

復革職留任處分加恩伊子向繼雄以同知用前據
吳文鎔張亮基叅其夸詐冒功飾智欺人徐廣縉亦
查其趨避過明非人是已朕俱不爲深究該提督宜
如何激發天良痛改積習感朕棄瑕錄用之恩力圖
殺賊立功之效乃本日據徐廣縉叅奏向榮於六月
二十七日先已接印至七月初六日奉到飭令任事
之旨竟稱病難速痊求該督奏請開缺朕不料向榮

喪心昧良膽大藐玩至於此極國家用人原期其才能幹濟即使功過不掩亦不妨舍短取長若向榮如此存心殊出情理之外現當粵楚軍務喫緊之際該提督從容觀望竟欲置身局外且可藉口於朝廷不能用其才統帥不能盡其力若軍營相率效尤兵驕將玩更復何所懲戒耶向榮著卽革職發往新疆效力贖罪以爲辜恩巧避者戒

初五日

癸未

掌福建道監察御史張銘謙奏言廣

西賊匪竄入湖南道州等處賊蹤無定伺隙奔突必須豫籌防堵杜其勾結自衡湘以北切近洞庭水路之防更爲喫緊必須招募熟習水勇先期布置湖南湖北二省雖有額設水師但承平日久武備易弛恐難得力擬照陸路團練之法各就地地方招募水勇以備差遣查湖南之洞

庭湖北之大江均有捕魚小船不下數千百隻
名曰網划其船輕利便捷不畏波濤大船不能
行之時彼能前行大船不能到之處彼能獨到
其人以船爲家童而習之何處可以停泊何處
可以偷渡無不周知又大江口岸水手慣習打
撈名曰水摸其人善於鼻水若以水摸之人乘
捕魚之船或作水師探報或作水師嚮導或爲

兵船護衛賊雖窺伺無所施其伎倆但此輩皆
係窮民易以利誘若不早爲招募轉恐爲賊所
用應請

旨飭下督撫大臣行知該地方官廣爲招募先行團練
編列字號統以水師堅明約束厚食以固其心
重賞以鼓其勇使若輩協力防堵以助水師之
聲援必能事半功倍奏入

上命軍機大臣傳諭程喬采常大瀆駱秉章曰御史張
銘謙奏湖南湖北籌辦防堵請招募水勇一摺漁戶
熟諳水性若用之得宜亦可以備緩急著該督撫等
飭屬各就地方情形詳加體察諮訪紳民如漁船可
用卽行妥爲豫備一遇警急該漁戶等既可自保生
業亦可協助水師剿捕因思楚省當此防剿喫緊之
時府廳州縣稽察彈壓尤貴得人若才力不及平時

既不能振作又安望其爲民禦侮捍患該督撫等務
須嚴加甄汰另擇人地相宜之員隨時酌調毋稍遷
就

初六日

甲申

署兩廣總督廣東巡撫葉名琛奏言

四月二十六日逆匪由廣西全州竄踞湖南道
州該省之江華永明藍山嘉禾桂陽郴州皆係
鄰境卽兩粵各屬交界亦多相通是逆匪大股

雖在楚境其牽掣兩粵情形實則並重臣與督
臣徐廣縉隨時咨商先期調度豫咨陸路提臣
崑壽統率兵勇馳赴陽山復又移紮連州扼要
防堵查逆匪甫踞道州之初廣東之連州綏濠
廳最爲喫重而連州尤爲緊要先經該提臣移
軍駐守督同各文武晝夜巡緝陸續拏獲奸細
四十五名並起獲尖刀銀兩及置買貨單內有

太平天國聖庫六字圖記隔別研訊各據供稱
皆籍隸道州江華零陵永明等處因逆匪遣令
假扮客商來探路徑有無兵壯防守等語其爲
該逆窺伺已可概見迨逆匪由道州竄出後六
月初八日先踞江華十四日復踞永明其大股
仍在道州二十六日寅刻全股竄出卽於二十
七日破嘉禾二十八日破藍山二十九日破桂

陽州七月初二日破郴州臣查桂陽郴州與宜
章皆相緊接而宜章與廣東樂昌之平石汎白
家山三峯堆尤爲密邇他如樂昌之銅鑼坪黃
土嶺乳源之白牛坪管埠汎仁化之城口汎陽
山之私人坳亦無不與桂陽宜章相連提臣現
駐連州所帶兵勇三千餘名分布各隘未能再
行抽撥兼之韶連各屬均與江華藍山江藍臨

武宜章桂陽交界相距皆不過百餘里或數十
里若必待連州分兵往應亦恐緩不濟急臣委
順德協副將通安前往接護南韶鎮篆並另派
兵勇三千名令其督帶馳往防剿一面飛咨提
臣互相策應遙爲聲援臣由羅定晝夜兼程已
於十二日抵省現在加緊籌防

同日常大瀆奏言據湖南岳州府知府廉昌稟

稱粵匪勾結土匪竄入安仁攸縣攸縣距岳城甚近稟請調兵一千名赴岳堵禦等情臣查湖南岳州府城及所屬之巴陵臨湘平江各縣均係緊連湖北現在匪勢猖獗業已竄擾攸縣並據南省探報醴陵瀏陽情勢俱極危急近岳郡亟應協力堵禦務保岳郡無虞方免蔓延楚北臣當卽飛咨提臣博勒恭武將前帶赴岳安

設水路之官兵一千餘名迅卽移於岳州府城
南陸路要隘紮營探明賊蹤調度堵禦並飛咨
程喬采駱秉章迅由長沙就近分派官兵馳赴
岳州一路勦辦 臣亦擬添兵前往交與提 臣協
同防勦且湖北交界如蒲圻通城崇陽各縣路
徑紛歧均應添兵以備堵勦各路距省僅三五
百里不等省垣存兵止有千餘名外營無可再

調查湖北官兵前經調赴粵南共計六千餘名
此時應在南省就近撥回策應相應請

飭下賽尙阿程喬采迅將所調湖北官兵剋日遣令
回省俾資調撥均奏入

命軍機大臣傳諭葉名琛曰逆匪由道州紛竄連陷
數城所有廣東毗連各屬先經葉名琛移咨提督崑
壽統率兵勇移營連州扼要防堵旋因韶連各屬均

與江華藍山江藍臨武宜章桂陽各州縣互相毗連
復委副將通安帶領兵勇馳往防剿是該省籌防尙
爲周妥本日復據常大瀆奏賊復竄入安仁攸縣東
奔西突觸處堪虞楚粵毗連各要隘急應嚴密巡防
柏貴起程北上已有旨仍令折回署理巡撫著葉名
琛卽酌帶將弁兵勇前赴連州一帶楚粵扼要地方
駐紮調度且可與廣西近楚邊界聲息相通隨時咨

會勞崇光籌辦一切徐廣縉抵楚後如勦匪得手仍須兩省夾擊該署督卽帶領弁兵出其不意越境協勦使該匪腹背受敵則殲滅更可迅速

上又命軍機大臣傳諭常大瀆曰粵匪竄踞道州連陷數城復竄安仁攸縣岳州戒嚴該郡與湖北連界常大瀆請將調赴湖南官兵就近撥回自係爲賊情緊急起見惟湖南勦匪正須厚集兵力前調湖北各兵

能否撥回勢難遙制著該撫隨時咨會欽差大臣等
應如何移緩就急之處酌量辦理該撫卽會同將軍
台湧提督博勒恭武妥爲布置於毗連各要隘嚴密
設防斷不可稍有疏虞

上又命軍機大臣傳諭賽尙阿程喬采曰據常大瀆所
奏各情衡州長沙岳州各屬已均有賊匪竄擾官軍
祇知尾追從未迎頭截擊且偵探賊情並無的信如

廣東現獲奸細四十餘名皆道州江華零陵永明等處人爲賊探路起獲貨單等物自係假扮客商希圖溷跡若湖南亦能確探賊蹤先時防備何至被其勾結連城失守我軍布置機宜旣不能慎密而賊匪轉得窺伺官軍消息恣意橫行所謂知己知彼者安在耶現在徐廣縉是否已抵湖南賽尙阿移營衡州以後與程喬采如何布置兩楚交界如何設防並賊匪

竄擾各處情形著卽迅速據實奏聞毋再延宕

上又命軍機大臣傳諭徐廣縉曰前有旨令徐廣縉馳往湖南接受欽差大臣關防督辦軍務諒已接奉起程矣本日據常大瀆馳奏粵匪勾結土匪竄入安仁攸縣恐由瀏陽小路竄入平江距岳州甚近探知醴陵瀏陽情勢俱極危急等語是逆匪竄出道州以後勢更猖獗江華永明桂陽嘉禾郴州之陷疊經賽尙

等奏到聲敘月日亦未明晰茲據葉名琛奏自六月初八日賊匪先踞江華至七月初二日攻破郴州中間尙有二十八日攻破藍山之事似此情形不但衡州可以超越長沙岳州亦萬分喫重該大臣抵楚後卽將前奉諭旨宣示賽尙阿接受欽差大臣關防統領全軍計賊匪現雖肆擾尙在奔突未定之際且官軍勇練數萬人若得人調遣何至任賊橫行總由

賽尙阿督師日久無功兵與賊均不免心生玩視該大臣當嚴定賞罰申明紀律爲一鼓成擒之計岳州勢當孔棘兩省交界處所尤當力籌堵禦萬不可再令蔓延湖北兵力較單豫皖徵調恐到亦需時如何計出萬全俾居民不致驚擾之處著與常大瀆妥商辦理柏貴現在折回廣東葉名琛卽可馳赴連州防堵如楚省勦辦得手有須夾擊之處並可越境圍攻

一切調度著徐廣縉與葉名琛隨時酌辦其廣西防
禦事宜卽責成勞崇光經理

同日陸建瀛奏言臣查江西之袁州吉安南安
三府皆與湖南之郴州等處接壤湖南賊勢猖
獗江華永明嘉禾三縣及桂陽郴州二城失守
江西沿邊處所皆已震動署撫臣陸元烺調撥
官兵分赴各縣妥爲堵禦並委署鹽法道王訓

前赴袁州其吉安南安一帶卽責成該管鎮道
督率辦理布置似已妥協惟賊情叵測江西巡
防誠不可不慎之又慎昨又接安徽撫臣蔣文
慶咨准湖北督撫臣咨會豫備安徽官兵一千
名前往湖北防堵業已遵照挑備一俟准調卽
行起程等情臣查安徽省爲江西唇齒之區該
二省額兵本屬無多前已調派安徽壽春官兵

一千名前赴廣西又調江西九江官兵二千名
前赴湖南設該逆竟敢直撲長沙省城或擾及
近省之湘潭等縣則湖北之漢口一帶卽行戒
嚴九江地處下游一水直達彈壓無兵民情難
免驚惶况袁州等處已近賊氛設有緩急不能
不就近藉資安徽兵力臣當飛咨安徽撫臣卽
將豫備湖北徵調之官兵一千名俟得江西續

報再行調遣奏八

上命軍機大臣傳諭蔣文慶陸應穀曰前經降旨令蔣文慶於安徽選備精兵一千名陸應穀於河南選備精兵二千名聽候湖北咨調本日據陸建瀛奏稱安徽所謂之兵請俟江西得有續報再行調遣等語惟現在湖北籌防緊要皖豫距楚道途較近自應先其所急著蔣文慶陸應穀仍遵前旨於各營兵丁抽撥

足數迅卽派往備用

初八日

丙戌

署江西巡撫羅繞典前任湖南巡撫

略秉章湖南提督鮑起豹奏言粵匪竄擾楚境

臣鮑起豹准大學士臣賽尙阿照會赴省防堵

並派撥江西官兵一千名防護省垣旋准督臣

程喬采來咨郴州賊匪探聞欲由醴陵竄越江

西囑卽撥兵赴醴陵茶陵攸縣堵禦該匪自出

道州久有分路撲省之謠正在調撥官兵分投
防堵突聞安仁攸縣於十八九等日失守賊卽
轉竄醴陵至二十八日辰刻猝至省城偏近南
門外妙高峯駐紮臣等當卽飛調石馬鋪等處
屯紮之陝西各營官兵相機合剿並於城上密
排礮位督飭四川江西各營兵勇登陴開放與
該匪對擊相持兩時之久復運大礮於南城魁

星樓上連向賊營轟擊經四川營弁兵瀏陽鄉
勇首先斃賊百餘人賊勢稍退復向大西門小
西門一路潛行及東南鼇山廟等處分駐臣等
復咨西安鎮福誠等約會各營兵勇設法圍剿
並於招募瀏陽勇二千名內先飭五百名向前
迎敵擊斃百餘人查據現到賊匪土匪已有萬
人尙有大股在後湖南省城防守兵勇甚形單

弱臣等惟有激勵將士熟商防勦並飛咨徐廣
縉迅飭和春管帶大兵來省應援仍督飭員弁
紳士分帶兵勇團練豫防土匪嚴查奸細以期
人心固結兇鱗立除

羅繞典又奏言再 臣奉

旨試辦築堡事宜現屆秋收農事未暇須俟收穫事竣
先擇緊要處所遵

言試行正在查辦聞忽值賊匪圍逼省城亟籌防剿祇
得從緩試辦至省城駐兵本單先經臣查瀏陽
鄉勇人甚果敢會商撫臣招募壯勇二千名以
備調遣此次開仗亦尙得力奏入

上命軍機大臣傳諭羅繞典鮑起豹駱秉章曰羅繞典
等奏賊匪攻陷安仁攸縣轉竄醴陵猝至省城逼近
南門長沙爲楚南根本重地逆賊旣由間道疾趨而

來並有大股匪徒在後何以衡州大營官軍先期並
無偵探沿途又未邀擊豈衡州刻下亦被賊圍撲耶
且恐賊計詭譎陽撲省城而陰遣夥黨竄擾岳州湖
北防兵亦僅能自顧無暇越境攻擊朕心殊深焦灼
賊匪踞高憑險復分撲近城各處我兵必須於城外
要隘倚角環攻令賊進有堅城之阻退無奔竄之路
內外夾擊方可大挫兇鋒現已飛飭賽尙阿等速派

鎮將督帶大兵前來援應該撫等惟當激勵將士安撫居民毋令張皇遷徙督率地方紳士勸募勇壯分守各門偵拏奸細盤詰賊情虛實一面密遣得力文武官弁設奇出勦勿徒株守城中專待外援致令賊勢更熾羅繞典昨已有旨令署江西巡撫此時防守緊要自未便分身前往俟張亮基抵任省圍解後再行奏明請旨湖南防勦情形並著隨時知照常大瀆

一體嚴防毋稍疏懈

上又命軍機大臣傳諭賽尙阿程喬采曰道州逆匪由醴陵猝至長沙省城偏近南門外妙高峯分擾近城各處大軍現紮衡州乃任聽賊從閒道直徧長沙並不派兵邀擊亦未據報近日攻勦情形豈坐擁重兵待賊自斃耶現在羅繞典等督飭四川江西各營兵勇登陴守禦省垣重地豈可稍有疏虞如衡郡尙未

被圍賽尙阿卽帶領大兵迅赴長沙一帶督飭鎮將
員弁於城外水陸各要隘分路攻擊使賊匪腹背受
敵更宜嚴拏奸細多設偵探不惟知彼知己且內外
聲息相通互資策應則剿滅更易得手惟賊情詭譎
難保不分股竄擾或徑窺岳郡或轉掠衡州亦宜偵
探的確豫爲布置並著程喬采督飭文武員弁分路
堵禦以杜紛竄毋但坐擁郡城一籌莫展

上又命軍機大臣傳諭陸建瀛陸元烺曰江西吉安瑞
州袁州各屬多與湖南毗連且賊匪本有由醴陵竄
越江西之謠邊界地方亟應嚴密布置至團練保衛
及地勢夷險情形本省紳士尤爲熟悉前任刑部尙
書陳孚恩現告養親回籍近在省城卽著幫同陸元
烺辦理一切團練防堵事宜隨時商酌務使官民聯
爲一氣

上又命軍機大臣傳諭徐廣縉曰本日據羅繞典等奏賊匪由醴陵猝至省城逼近南門占踞妙高峯經羅繞典等督率官兵登陴轟擊賊勢稍卻復由大小西門至東南鼇山廟一帶潛行分擾雖省垣防守尙爲嚴密而兵力未免單弱現已有旨令賽尙阿統領大兵赴援而衡州是否被賊圍撲亦尙未據奏報朕南望焦灼寢饋難安該大臣何日由粵帶兵起程抵楚

後應於何處要隘紮營何處分兵截擊總期迅速援
剿萬勿稍誤事機且賊自郴州北趨越衡郡而徑撲
長沙不顧我軍之襲其後若帶兵大員調度得宜賊
之冒險深入亦有孤注之勢大兵前後夾擊何難一
鼓殲擒但恐師老力疲將士驕玩畏蕙致令賊氛日
熾坐失事機軍情變幻旦夕不同亦難遙度想該大
臣與朕同此焦思定能權衡緩急計出萬全也其兩

粵防堵事務該大臣隨時與葉名琛勞崇光互相知照並將楚中勦賊情形與確探賊蹤所向隨時知會廣東廣西或嚴守邊界或越境痛勦妥籌辦理

初十日

戊子

陸建瀛奏言接陸元娘函稱據各屬

探報湖南之永興安仁攸縣於七月二十四十九等日先後被賊蹂躪二十日已至茶陵州該州與江西之蓮花廳壤地相接勢甚危急又

聞該逆有由蓮花廳至永新縣而趨吉安府城
之謠臣查此時逆匪俱在茶陵州一帶江西之
吉安等處已成切膚之患相應請

旨將湖北省奏調之安徽官兵一千名飭令帶兵各官
先由捷徑馳赴江西聽候署撫臣調遣臣仍會
同安徽撫臣蔣文慶再於江蘇安徽官兵內選
調精兵一千接續前進

同日常大瀆奏言臣查粵匪自廣西全州竄踞
湖南道州連擾江華永明嘉禾桂陽各州縣旋
竄踞郴州分踞永興旬日之間復分股竄擾安
仁攸縣直由醴陵攻撲長沙勢甚猖獗下游岳
常二府緊接長沙多與湖北連界竊計南省粵
匪已由兩廣督臣徐廣縉帶兵赴南會剿長沙
以下必須多兵迎頭攔截堵回合剿方可一鼓

雖除否則大兵在後尾追賊必由岳常直撲湖北湖北口隘紛歧在在需兵提臣博勒恭武駐紮岳郡分設防守止兵一千餘名尤須添派前往協助所有奏奉

諭旨准調安徽河南之兵值此賊情緊急未便緩期少調應再請

飭下安徽撫臣將所調兵一千名河南撫臣將所調兵

二千名迅速如數派齊催令來楚俾資調撥均
奏八

上命軍機大臣傳諭陸建瀛曰陸建瀛奏湖南之永興
安仁攸縣先後被賊蹂躪七月二十日已至茶陵州
與江西接壤勢甚危急請將湖北所謂安徽官兵改
赴江西惟本日常大瀆奏賊撲長沙省城恐分竄岳
州常德直偪湖北是現在情形湖北尤爲緊要所有

前調安徽官兵一千名著仍遵前旨飛速調赴湖北
至江西兵力不敷著該督卽會同楊文定蔣文慶於
江蘇安徽二省官兵內選調精兵二千名馳赴江西
吉安袁州瑞州一帶聽候署巡撫陸元娘會同在籍
尙書陳孚恩酌量調遣

上又命軍機大臣傳諭常大瀆曰前諭令蔣文慶等仍
遵前旨抽撥官兵趕緊派往湖北本日復諭令江蘇

安徽派官兵二千名以備江西防堵並於陝甘兩省
再備精兵三千名豫備接替以壯聲勢其先經該撫
奏調之安徽兵一千名亦諭知陸建瀛等仍派赴楚
卽著該撫與將軍提督扼要派撥妥爲布置毋稍疏
虞

又命軍機大臣傳諭舒興阿張祥河曰湖北江西兩
省防堵緊要已有旨令安徽河南各調精兵迅赴各

該省聽候調遣惟豫皖兩省調兵過多須於鄰省備
調接應以壯聲威著舒興阿張祥河於陝甘各標官
兵內選備精兵三千名如安徽河南等省咨調卽奏
明派往毋誤

十一日己丑羅繞典駱秉章鮑起豹奏言臣等昨

因賊匪猝至省城城中僅存四川江西官兵二
千餘名賊勢猖獗不敷防守當卽飛調駐紮金

益嶺之沅州協副將朱瀚管帶九谿等營官兵
又咨飭陝西西安鎮福誠潼關協副將尹培立
等分帶陝西官兵設法圍剿並咨賽尙阿程喬
采迅飭和春管帶大兵來省應援二十九日該
匪復於妙高峯上對城開放槍礮兵勇幸未損
傷臣等指揮弁兵於城上用槍礮擊斃數十人
該匪挑土肩石蟻聚蠶上意欲建築礮臺臣鮑

起豹督飭將弁用大礮連向轟擊傷斃數十人
闐然四散經臣等先遣瀏勇千餘人豫伏山下
攔頭截勦又斃百餘人瀏勇亦有傷亡該匪仍
踞鼇山廟及馬姓高屋於牆隙疊開槍礮我兵
分投放火將鼇山廟馬姓高屋焚燬該逆不能
存身亦卽紛逃兵勇截殺該匪大股繼至寡不
敵衆而金盆嶺之沅州協副將朱瀚先於二十

八日因石馬鋪陝西營盤失守前往接應復有賊繞黃土嶺回撲該副將營盤兵勇四散其在石馬鋪陝西潼關協副將尹培立等管帶陝西兵二千名亦先因與賊匪開仗尙無下落現在該匪麕集南門外之金雞橋並瀏陽門外之校場時復游弋小烏門等處人數甚衆晝夜環攻臣等疊次飛咨臣賽尙阿臣程喬采將前撥安

仁之河北鎮及鄧紹良並張國樑等兵勇六千
名先赴省垣並咨現在岳州防堵之湖北提臣
博勒恭武迅帶官兵前來應援又沿途迎提下
游川黔等省未到官兵一面飛咨賽尙阿等迅
催和春帶兵來省救應臣等惟有設法固守力
保危城斷不任稍有疏失奏入

上命軍機大臣傳諭羅繞典鮑起豹駱秉章曰逆匪大

股環偏城垣金盆嶺之沅州協副將朱瀚及石馬鋪之陝西各營盤均先後失利該匪現聚南門等處其北路一帶諒不至於阻隔所有城內應需等物務須設法轉運源源接濟毋致有匱乏之虞方可持久仍須時出奇兵以撓賊勢賽尙阿統領大兵此時諒已行抵長沙湖北提督博勒恭武紮營岳州去長沙甚近計不日亦可帶兵趕到徐廣縉自廣西督帶精兵

計亦行抵楚境該撫等惟當激勵守城兵民紳勇竭力固守無稍疏懈各路援兵一到卽飭城內兵勇與城外各兵併力夾擊陝西西安鎮總兵福誠潼關協副將尹培立並沅州協副將朱瀚現在城外何處潰兵如何收集有無退避情事查明具奏

上又命軍機大臣傳諭賽尙阿程裔采曰賊匪圍逼湖南省城情形危急該大臣等統領重兵防勦賊匪保

衛地方是其專責乃任聽賊眾猖獗進逼省城漫無
應援且省城被圍情形何以該大臣等並未具報現
據羅繞典等奏稱已疊次飛咨該大臣等派兵救應
是文報猶未阻絕豈奏報轉難馳遞耶著將現在賊
勢及剿辦情形迅卽據實具奏並著賽尙阿統帶各
路將弁兵勇趕赴長沙合力援剿徐廣縉此時想已
帶兵抵楚湖北防堵之兵已諭令相機赴援該大臣

務當振刷精神策勵將士毋再玩延致干重罪

上又命軍機大臣傳諭徐廣縉曰前經疊次降旨令徐廣縉帶兵兼程前赴湖南督辦軍務本日又據羅繞典等馳奏逆匪圍逼長沙甚爲緊急恐賽尙阿等現在衡州形勢隔絕呼應不靈卽派兵赴援亦恐不善調度致失事機該大臣接奉此旨務卽星速帶兵前來並隨時偵探賊情相機籌辦

上又命軍機大臣傳諭台湧常大瀉博勒恭武曰逆匪
攻撲長沙省城湖南湖北唇齒相依若長沙稍有疏
虞則湖北更難防堵台湧現在荆江一帶擇要嚴防
博勒恭武近在岳州著卽督帶官兵星速馳往長沙
援勦該將軍等當酌量緩急毋得坐失事機

上諭內閣曰逆匪自竄踞郴州以後膽敢繞越衡郡直
撲省垣賽尙阿等若能迎頭截擊何至令其肆行衝

突卽使驍騎管隊深入亦應迅速發兵救援將現在
攻勦情形詳悉奏聞何以半月以來並無奏報殊出
情理之外賽尙阿程爾采均著摘去頂戴拔去花翎
仍著賽尙阿統帶官兵馳往長沙徐廣縉此時當已
帶兵行抵楚境著卽併力夾擊湖北提督博勒恭武
現在岳州防堵亦著帶兵前進趕緊應援羅繞典等
務當激勵兵勇紳民盡力守護朕現復簡派各省勁

兵卽日赴援賽尙阿統帶全軍程喬采節制兩楚均屬責無旁貸儘再玩誤失機自問當得何罪

十二日

庚寅

賽尙阿程喬采奏言臣等伏查自賊

踞郴州後卽經嚴飭各軍分投截剿雖據各路探報屢經獲勝尙未挫其兇鋒現在逆匪大夥及各逆首仍踞郴州永興興甯安仁各土匪勾合起應並聞賊中有將由衡州直撲長沙荊州

之謠州縣官民勇練一聞賊至立時奔潰以致
所在城池失陷賊氛愈熾各處土匪勾連愈衆
和春等大軍與賊大夥相持恐賊故分其勢希
圖掣我兵力更滋猖獗殊於大局攸關未敢輕
動安仁城池現已收復其永興之賊分踞已衆
總兵常祿一軍兵力尙單不敷攻勦臣等飭令
叅將德亮將所帶張國樑等捷勇四千餘名歸

其調遣以期併力進攻惟安仁之匪又已前竄
攸縣醴陵各地方該處與江西吉安袁州所屬
在在毗連節經臣等飛咨江西撫臣飭吉安袁
州等府嚴密籌防又咨閩省督撫將所調福建
官兵三千飭令取道江西來楚儻賊匪竄至江
西境內卽可迎頭堵擊刻下郴州大夥賊勢未
衰廣東韶州府屬仁化縣本月初間又突有匪

徒千餘聲言欲由樂昌九峯等處竄赴湖南桂
陽州一帶臣等當卽飛咨廣東督撫臣飭屬嚴
行堵截並經和春分兵暫紮興甯亦可兼顧東
面惟和春大軍所紮獅子嶺偏屬西南現在軍
情應以東北堵截尤爲緊要臣等飛函飭令量
由東北移紮適接和春稟二十日移營至黃泥
坳二十一日大雨未經出隊湖南貴州官兵楚

勇並守備米興朝等楚兵共五千名於二十二日冒雨拔營抵臥烏坪派知府朱啟仁帶潮勇在於該處紮住係賊東路和春仍督兵勇前行至陳家樓安營係郴州東北賊之前路並留總兵王錦繡帶領雲南官兵廣西提標勇丁仍紮塘昌埠當賊西路總兵經文岱清保帶雲南兵勇及江西兵當賊南路即日相機合力進剿其

陳家樓地方並查有小道可通永興如賊全竄
仍可繞出攔截等語臣等仍飭迅速合力進攻
卽將該總兵布置情形徧飭總兵常祿王家琳
副將鄧紹良及咨明撫臣駱秉章羅繞典查照
並令常祿等乘賊勢斷力分率同德亮等銳速
進攻永興之賊令王家琳將所帶河南新兵暫
紮安仁毋任前竄攸醴之賊復回占踞兼防永

興之賊被擊前竄極力攔擊復催鄧紹良帶兵
將攸醴之賊趕緊追擊乘勢掃除並由衡州撥
出苗兵一千協同防剿一面咨撫臣等由省派
撥新到陝西兵千名從醴陵等處迎出與鄧紹
良之兵合力探蹤諸截似此四面兜圍已將掃
州永興及前竄攸醴之賊層層截斷或冀諸軍
齊力一鼓奏功臣等嚴鎮衡州扼要居中調度

署桂陽直隸州知州李啟詔帶勇擊賊力盡投
水身死署郴州直隸州知州孫恩保擊賊被戕
遇害甚烈江華縣教諭歐陽復被執不屈遇害
相應請

旨交部從優議卹並於各任所原籍祠祀其餘在城文
武統俟查明分別辦理至賊踞朱家灣山頂各
路兵勇奮力鎗上追擊抄殺獨雲南兵勇退至

山下殊屬怯懦該統兵官總兵經文岱由臣賽
尙阿摘去頂戴其督兵不力之雲貫督標右營
遊擊呂盛元直隸遊擊白人鵬卽由總兵和春
摘去頂戴以示薄懲

賽尙阿又奏言據撫臣駱秉章羅繞典提督鮑
起豹咨賊匪偪近省城在金盆嶺接仗之陝西
兵丁被賊衝散賊匪竟敢赴南門一帶圍城除

一面嚴飭兵勇防堵外飛咨速派重兵來省救
援臣等當卽專弁持令飛催鄧紹良楚兵及前
由衡州派赴長沙之委員賈晉亨所帶苗兵各
一千名又收復安仁暫紮該縣之總兵王家琳
所帶河南官兵一千名各由水陸星馳赴援並
飛札現隨常祿攻打永興之副將瞿騰龍所帶
苗兵一千名亦卽由永興赴省救應另飭該副

將單騎或帶精銳迅速兼程由閒道星馳晉省
以資守禦一面飛飭和春常祿等確查郴州大
夥及永興分踞賊勢酌量分兵赴援奏入

上命軍機大臣傳諭賽尙阿程喬采曰賽尙阿等近日
辦理軍務諸多遲緩屢次奏報或稱調兵未齊或稱
臨敵遇雨皆係據各路稟報藉詞搪塞現在賊踞郴
州分擾各縣直逼省城勢甚剽急而我兵遷延散渙

卽尾追亦不能盡力所陳合力進剿分路堵截之處亦恐全無把握昨已降旨摘去翎頂稍示薄懲該大臣等務當振刷精神激勵將弁奮勇圖功以贖前罪斷不可任聽各營飾詞稟報再誤事機臨陣怯懦之總兵經文岱遊擊呂盛元白人鷗仍著嚴查如係有心退避卽行嚴叅已革湖南提督余萬清前經降旨革職孛問交程喬采嚴審定擬復令賽尙阿會同審

辦迄今日久並未奏到此等情節一經查訊何難定
讞乃亦如此延緩軍律何由整頓耶著卽將此案迅
速定擬並將革職拏問之總兵劉長清一併訊擬具
奏

上又命軍機大臣傳諭葉名琛曰前據葉名琛奏稱湖
南道州逆匪竄出分擾逼近廣東交界當諭令酌帶
將弁兵勇赴連州一帶扼要防剿計柏貴奉到前旨

亦卽馳回廣東矣現復據賽尙阿等稱有粵匪欲竄桂陽之信恐與道州竄出逆匪勾結爲患著葉名琛仍遵前旨迅速帶兵馳赴楚粵交界地方扼要堵剿並與廣西聲息相通隨時咨會勞崇光妥爲布置徐廣縉不日到楚如須夾攻該署督卽督兵越境協擊以慰廑念

上諭內閣曰本日據賽尙阿等馳奏賊匪仍踞郴州分

竄永興安仁攸縣醴陵等處復敢由閒道直撲長沙
省垣該大臣現已飛催鄧紹良及委員賈晉亨副將
瞿騰龍總兵王家琳由水陸星馳赴援並飛飭總兵
和春常祿等分兵星速赴省策應卽著該大臣督飭
帶兵大員與長沙城內外兵勇合力夾擊儻帶兵各
員遷延觀望畏葸不前卽著立正典刑毋稍姑息署
桂陽直隸州知州李啟詔帶勇擊賊力盡投水身死

署郴州直隸州知州孫恩保擊賊受傷遇害甚烈江
華縣教諭歐陽復罵賊不屈遇害該員等忠憤捐軀
深堪憫惻均著交部從優議卹並於各任所原籍祠
祀以慰忠魂其餘在城文武均著確查具奏